

四庫全書

集部

欽定四庫全書

海壑吟稿卷十

明 趙完璧 撰

祭毛行齋親家太守文

公輔之胄賢聖之徒社稷禎幹宗廟璉瑚清才通朗輝  
映天衢武繼三世芳聯五株三守名邦琴鶴與俱白雲  
興思玄髮來趨抗章解組林石江湖桑榆承慶塤篪偕  
娛一觴一詠蕭洒從吾盈虛伸縮造化一途高標逸韻

超然萬夫嶠南鄙叟迺敢趨隅喬絲不棄慚與葭莩篤  
我懇至慷慨交孚情瀾不既玉魄陽烏送我魏闕識我  
區區秦隴懷君同味秋鱸江山十載胥視凋枯我舟未  
剡君豎迴盧君垂夙愛我抱今辜悲心忽折淚下嗚嗚  
臨哭未即窀穸罔圖支離莫慰幽鑒不誣遙託哀誠以  
薦芳醑渺不可測天濶愁予邇不可招奏鼓吹竽瞻望  
咨嗟何射何虞

代祭匡環溪文

閔閔之裔雄於海鄉清俊之才沈於林塘陶真觴詠娛  
情文章竹林逸韻蓮社清光一經垂訓四國斯揚桂窟  
秋擢桃水春芳慙予不肖謬附翱翔昔分南邑慶過華  
堂今還北覲嗟慕沾裳悼彼電露胡存胡亡公不我留  
我為公傷仰公一哭誰云非福五十餘齡不稱殒速身  
棄國榮子崇君祿忠良有聲公遺之穀紫誥濊澤黃壚  
永沐澤溢松楸芳流山谷顧此殯宮梨雪春風淑嗣有  
情王程倥傯不遑素車結此丹衷聊爾薄奠以表無窮

代祭劉石渠給事文

君負雋才迴茂佳名君崇令德宜壽此生胡方階於青  
瑣儵謝塵於玄冥小試秦關甫兆大行蒼生不幸奪我  
豪英仰昭昭之禍善窺渺渺而未明追憶淮南慰聚風  
萍瞻望悴顏恍爾惕驚送君南渡煙水關情聞君北歸  
鴻鴈稀征擬雲閒於海山冀日休於蓬瀛胡為乎虛扁  
無功哀此同盟江鄉杳杳幽襟痛盈乃今過便一吊孤  
檠酌觴在手不覺失聲

代彭麟野祭丘母夫人文

嗚呼母有順德藹如慈祥母有令範則於家邦佐宜君子閭闔用彰肅有懿訓薰蘭叢芳秋捷春榮滄岱輝煌耳目魏闕勾陳孔陽國崇英俊賢哉厥昌峻惟作艾煥錫寵光龍飛鳳翥猗歟青鄉垂白珠錦鳩杖華堂邈禧優優既壽且康理數之極今古之常頃復莞含九地何傷幽明一情樂意洋洋業慙非陋瑞鷺相將春霆桃水偕我翔翔微蘿罔棄寄託千章久揖堂下沐德何疆聞

母之訃惕母之亡紛我涕泗絕我衷腸適我先慈三載  
未忘還侍天陞執紼不遑道出瑯琊展我心藏愧無生  
芻豢有勺漿秋風蕭蕭愁雲茫茫青眼同袍靡恃雪裳  
離魂飛越靈鑒我傍

祭宋南亭舉人文

別君久矣莫挹夫咫尺望君邈矣徒仰夫空碧君之文  
章散為雲霞君之徽音寂夫泉石君之芳聲早已達於  
雲漢君之奇才猶未試夫霹靂惜哉逝而沈珠毀璧哭

君以綵筆言盡而思深弔君以朱絲琴破而恨積曠萬  
古其何期適星霜之兩易撫九原其誰招冀椒蘭於一  
格忝君姪戚痛君夙昔淚淒淒以衝襟風梢梢而過柏  
代春泉兄率諸弟祭東溟翁太叔文

昔我先大父畎畝高人樹德績學志存廓清屯淹未揚  
產我先君及叔父舉有奇資時以達人致望其誰曰不  
然弘治戊午秋我先君膺薦叔父失利先君嘗憾其不  
得為蘇氏同榮且曰我弟負雋才必魁東人終當不隕



金匱要略卷之八  
厥聞芳聲嘉譽震灼海隅莫不逆知其非塵埃中人詎  
意木難殊珍竟遺澥渤可若何孔子曰賢不肖才也遇  
不過時也叔父亦久諳斯言安於所寓又焉怨嘉靖癸  
未有司貢於朝分教西潞文澤汪濊上下悅之庚寅春  
奔我先大母喪越明年叔父以疾終於戲於戲何痛如  
之我先君宦遊七載倦還叔父甫出先君卧疾鴻絕離  
傷兄弟不獲一訣而逝及叔父來歸我諸孤咸庸劣失  
怙仰其撫我祐我義訓我等動定其又或雨夕風辰春

亭秋圃娛情觴詠彷彿阮謝清風所深願也不圖皇天罔  
吊爰棄我老成宗親蘭蓀其摧矣琬琰其碎矣迸淚失  
聲潺湲其如霰也吾弟楚珍負梧篁秀姿抱鴻鵠遠圖  
信叔父所未信者擬在斯人叔父其又何憂廷璧不肖  
粗通書史忝廁下舍無足言我母弟完璧淬礪不墮亦  
欲罔忝先世而白璧又進學未艾所可哀者我母兄良  
璧殂於去年之七月而不得同哭於柩前是為泣盡而  
心死也幽冥如知覲我先君暨我兄妹骨肉相將顧念

故鄉事何如楚惻家勢殊昔書生亦悉有令圖叔父其  
又以是為先君慰焉爾者楚珍弟卜於容成筮於巫咸  
曰維庚申是為佳辰將厝之王村之陽以安窆寔廷璧  
等致薄奠臨哭之嗚呼斬我享

代同鄉諸朝紳祭杜太翁文

即墨杜介菴  
進士太翁也

福莫大於壽也而公惟遐齡壽恒本於德也而賢嗣足  
徵瞻滄溟而緬懷逸韻邇玉麟而遙挹芳聲德教如春  
公之器度太虛也茫然莫測義訓名世公之文章龍蛇

也變化可驚康濟之學曾無少試於一七幽潛之德竟  
亦淑伴夫寒星鴻鵠高翔於碧落蕙蘭獨秀於中陵陶  
意海濱弄濤聲而金紫長辭於煙駕放懷詩酒翫雲影  
而利害不怵乎天精公所不得於人者得之天龐眉鳩  
杖迴出風塵之外公所未信於身者信之後鳳毛虎變  
垂光虹霓之明公其無知耶其有知耶黃腸雖沒於窮  
塵而玄壚殆開夫一噓公其果逝耶其未逝耶雪羽驚  
翻於華表而金身或脫於五行蘭香係屬蓋邈乎其難

彷彿山密邇信蕭然其先登但悲莫悲兮銀燭淒淒父  
不得易簀於其子慟莫慟兮金臺渺渺子不得招魂於  
其庭抱黃泉之恨者鳳闕華封茲莫待以膺夫榮寵慕  
昊天之德者龍章美贈終猶可以慰乎衷情春風蕩而  
梨花飛回首英魂之莫即曉煙開而山水綠墮淚頽波  
之益增某等哀哲人兮天濶冥冥送孤帆兮楊柳青青  
靈不返兮芳草萋萋杯不乾兮憂心忡忡

代祭同年丘肖林太守墓文

仰君桂芳妙齡騰光渴依輝采百里渺茫甫丑之春挹  
袂易陽彼蒼莫違合并孔良慰斯蘭臭江曲徜徉忝君  
尺木比翼翱翔媿我萑葦伊邇琳琅看花春永翦燭宵  
長膠漆異境風雨連牀豈無同袍誰其范張豈無相知  
兩世相將我志子心子無我忘歟焉而渙波駭雨散南  
北相違天涯目斷淮水悠悠塞雲漫漫懷子沈疴冀子  
鶴筭五馬方來胡遺一旦并計江飛爽越意亂天乎斯  
尤奪我良儔推此玉樹華乃瓊樓春紅電碎夏綠霜休

九霄子期夕景子道予獨何心而不悽愁淚盡千里抱  
痛曷已吊不及哀祖云邈矣夢魂勞思寸心負此綠琴  
悲鳴原草青青一死一生何如為情擾擾逾時豈易生  
平遙馳一觴敬酹幽旌劍意猶存不罄遠誠

祭逸菴丘翁文

公雄豪之氣英敏之才製荷結蕙鏹跡海涯不以顯慕  
不以隱憂殆古之有道君子今天下之不可望焉者也  
然盛德無當世之榮於穆有豐後之報月林仲嗣琬琰

淑姿鳳麟嘉瑞非由庭教曾不信然乃爾早擅科名顯  
崇樞要天下想望風采罔不有太平之慶公之意於是  
乎殆慰矣乙卯冬欸然來京曾不知凝洹之嚴馳驅之  
艱其君臣之義父子之仁蓋兩懷之也諄諄詳切輔郎  
所未及而勉旃以清忠高節此真愛主上無已而因以  
愛子有道欲凝其志使無分焉公其賢矣哉既而浩然  
東還吾黨諸賢弗克為遲留之計祖侍道左瞻望芝顏  
不惟知仁者之必壽而且逆識矍鑠翁之終迂天錫也



茲聞逝矣精爽飛越五內痛傷風有葭莩之好今不得  
徬其形聲素有山斗之仰今不復揖其輝彩老成云亡  
吾道其可哀也夫嗚呼我心有惻天道不誣七十餘齡  
不為天矣賢士登庸不為窮矣子孫繩繩幾於昌後矣  
異時龍章煥九原之光不以死而亡矣公於幽冥不亦  
憮乎哉但高堂雲斷於海天孤兒魂飛於蓬闕生者倏  
而歿萃者忽而離造化無常人事靡定變若浮雲運同  
逝水此不肖所為交痛於相知對泣於羈旅也吁噫其

戚也何涯其靈也何招姑一酌惟鑒之

祭妹丈黃海野文部郎文

嗟乎公逝矣於公何言哉公靈鍾海嶽貞超塵埃落落  
胸襟淺鄙莫測德誼評於鄉閭文章品於翰苑政在朝  
廷名在天下何假煩言但三十餘年締結親情有莫能  
忘焉者如春如醪溫然藹然同胞之愛出自純誠骨肉  
之好久於初竟發我覆蒙達我幽曲雖同乎相接殆異  
乎相遇也方公小試夏郎予亦叨業成均值偶燕亭聊

足相慰者幾再易寒暑復無妄適災於奄忽風萍各渙  
於天涯可樂者無幾可悲者尋至矣相續來歸違越百  
里煙草芊眠塵機縈滯情雖親而迹益疎雖公之再起  
再歸日月逝而會晤稀青眼寥寥白髮種種矣況乃牽  
絲冀北解組關西中間相去又幾十年鴻魚固不相棄  
而留想亦自遙然也仰過公間扣門秉燭把袂披心悲  
歡交切覽容鬢之凋然慨精爽之殊昔且驚衰老而猶  
喜有香山之約也指屈海峯遙期勝槩拽藜雲石帆錦

煙溟掃殘紅於春醉採落英於秋風擬襟抱一時之豁  
如式爾我崦嵫之奇遇也何意宿隕山摧老成云逝冥  
漠其不吊矣哉聞訃震惶魂越而淚血悼離合之靡常  
傷歲月之莫待公其如遺我生其無意矣夫腸斷遙天  
扳舁罔遂託愛子執紼酒一表厥哀嗚呼公不以生樂  
不以死哀蕭然於造化中與元氣相徘徊今古誰能不  
死公何戀於塵埃墓門寂寂雨雪皚皚白楊含風玄泉  
生苔生人之情曷既逝者之往詎追三甥在傍英爽若

來九原冥冥使我心摧公其風雲而浮耶水之在地而  
沈耶精爽攸寓將無感於斯哉

祭亡壻毛尚寶文

嗚呼子之心胸涵千古而莫測子之才華豈近代之易  
得聆子之唾嗽瓊珠綺粲之悅心依子之光儀玉樹清  
標之動色詩禮浸涵自五馬之庭金紫承傳本三公之  
德北超鳳闕匪懈之義履霜月於娟娟東慕鶴巔無忘  
之誠睇雲溟而惻惻播芳聲於畿輔以得御為榮仰芝

采於依稀以封侯未亟忽鳳臺而失侶屑膠水以求皇  
荆布不鄙幽燕相將海人衰晚爰資清光豈意帝簡金  
城一方忝與葭莩朝夕相忘久子之處也飲醇醪而罔  
覺其醉美子之度也探淵海而莫可或量把酒論文落  
青燈於殘月鳴琴逸興共清風於偉簞蓋冀其同遊百  
載尚虞其各宦一方何意一疾之奄歟竟致百醫之莫  
良仁者必壽兮子何為天天何迂濶兮善有可疑要自  
有數兮今不能移而尚亦有報兮胡可度思秋風淅淅

兮使我心悲燕臺悽悽兮老鶴如癡惟酒兮在罍惟痛  
兮有情魂來歸兮鑒此誠淚不斷兮吞此聲

代京師王次菴舉人兄弟祭亡妹文

嗚呼淑人復能覲閒雅之貌耶復能寧故里以慰骨肉  
之情耶翳其長逝而不可復追矣夫神飛越而震惶氣  
填胸而淚漬尚忍言之夫以柔順之德謂其可以衍後  
也而椒聊摧焉堅貞之質謂其可以永世也而昆岡火  
焉得非冥冥迂濶昧以難明天道有足憾而人情有不

能堪者耶然青鸞杳而瑤池寒顧氛濁其莫櫻霓裳邇  
而瓊樓迴何世俗之足戀淑人諒其有歸矣奈離腸斷  
而骨驚方寸死而魂銷其招之何據挽之何由也哉覽  
春花其在目挹寒松之可哀清冰凝而留想素月流而  
恍驚淑人之去若不可得而知兄弟之情抑豈可得而  
或盡耶况高堂人散於斜陽南浦鴻分於夜雨謂存於  
少者可延而後於悲者相慶矣今復若茲殆出於意之  
所弗及而事之難以逆焉者矣亦復何如其痛撫焦鬚



其若割慨睿謀以何偕曹闔虛而影滅秦臺寂而聲沈  
蘭薰充堂醪香泛竿同胞之酸恨無窮異路之芳魂莫  
即嗚呼嗚呼其來歸

祭灘邑通家翁文

嗚呼德蓄諸躬幽巖沈而未揚善薰諸遠頽風易而淳  
龐不以其銷然者悶然於懷乃以其充然者暢然於鄉  
井里之璞含光短褐空谷之蘭歛艷羣芳衣薜蘿兮以  
歌以觴老歲月兮惟瀛與滄淑後之義要有本於嚴詒

達人之報亦何爽於玄蒼奮跡青雲大魁天下徵昌白  
首晚憊斜陽廊廟之猷其庭除之蘊奎章之煥協褒錫  
之良韋布珍於萬乘波澤演於無疆囂然宇內而何憂  
何歎陶然冥漠而匪存匪亡通家之誼情每關於哀惻  
執紼之違迹有間於渺茫匍匐後期望松楸而絮奠愧  
慙無既掃泉臺於蕪荒靈兮來兮我依我將

祭內叔高翁文

公跌宕於山海間垂老猶有英氣八十餘齡酣歌陶陶

不役聲利終始克家之操共德無忘平生力善之心早  
夜不寘純孝之誠老而且慕垂訓之良義方無替諸郎  
滾滾冠裳躍馬季子昂昂風雲展驥昌於後者垂黃曳  
紫九地華榮光於前者飛龍舞鳳九天寵異悠悠冥漠  
中玄鶴崑崙青鸞蓬島則又何事嬋媛於塵世然而薰  
斯芳也酌斯漿也南氏之於尼翁豈無揮淚

代祭年家孫翁文

哲人逝兮江之水湯湯靈莫擬所之兮雲飛大荒純

德何依兮蓬瀛景望英聞不朽兮清風以長淑嗣不偶  
兮玄報未疆追琢有自兮美哉珪璋忝附驥末兮竊淑  
餘芳遙藉慶祉兮雲衢聯揚敦同袍兮抱寸心而夙降  
延世好兮趨杖屨之未遑山川兮雲雨異方蒼苔兮日  
夜以黃二豎幻兮侍藥罔將石城鬱兮夢魂渺茫切哀  
感於區區負遙懷於未彰兩媿幽明一罪滄洋顧秋巔  
以游神託霜鴻以致傷楸梧悲而西風淅淅寒花萎而  
宿莽蒼蒼洒涓滴於雲隈達誠款於海鄉遠兮邇兮我

心有藏靈揚揚兮慰我以回翔

祭丘母夫人文

嗚呼母之謝塵寰而去也曾莫掩乎雲旌母之歷清虛而遊也伊何慕乎遙征蓬瀛歸而波淺瑤池返而花明偕萼綠於鳳馭追杜蘭之雲輶揮珠璣而弗屑委錦綺以何輕後泥封於宸極鐫珮玉於太清超氛埃其如遺陟仙界於渺冥有範在庭有訓在經有子維楨有孫惟繩福壽歸乎兼美生死久乎兩榮早內交於賢嗣將以

淑孟母之芳聲越山川而百里竟不慰范子之幽情違  
晨昏於海曲忽飛訃而震驚愁霖冥而秋徂北風發而  
寒凝某也歷墟莽登丘隴而西來於以敬祖乎佳城和  
薤露以銜哀俯金局以致誠三酹瑤漿一哭玄靈

代諸僚友祭邊太夫人文

嗚呼母之逝也良可哀傷母之生也曷掩其光產自名  
閨春松茂清標於煙雨歸於巨室天桃成淑教於家邦  
屬既絕之哀絃辛苦無違戒雞鳴而弗怠拂先遺之弱

驚劬勞莫恤懲葭絮以何忘既而秦臺鳳失隻冷孤楊  
鄭館蘭摧一存兩亡天地永而堅百年之苦節冰霜冽  
而繫萬古之綱常分熊羆於寒宵勉學小子刀機絲於  
暇日激紹先良不欲墜厥緒者母之貞志必欲昌厥後  
者母之遺芳果而挺桂林之仙枝香浮蟾窟出芙蓉於  
綠沼秀絕帝鄉玉闕生輝賦羔羊以禪盛世金郊播譽  
屏豺虎以衛明王萍蹤倏而相值蘭馨契而相將令範  
表清朝而勲茂醇德醉素交以心降光於君上者母之

懿訓益著風於僚末者母之餘澤尤長將覲協斯人之  
願也攸而彌久厚彼蒼之艾也壽而且康慶泰嶽之崔  
巍遙遞孟魚於故里沐恩波之渙演終慰萊綵於高堂  
君以子賢賚遺有隕子以君祿仁孝未央何意桑榆暮  
而悲泉沈景望舒缺而婺宿韜芒珠沒瀛川地下抱倚  
閭之痛恨烏啼燕樹天涯憶杖魚以徬徨報乎我者無  
盡撫乎我者何殃嗚呼母謝塵界也山川還秀母遺賢  
俊也金玉其相孔雀堂深乘龍美青錢之選釣天日邇



石麟榮紫誥之章黃泉之幽母其容與青冥之表母其  
翱翔揚鳳旂兮吾不知其遊瑤池與瓊圃縱鸞馭兮吾  
不知其偕萼綠與蘭香某等感風雲而洽骨肉於一旦  
哀鴻雁而橫涕泗於萬行忽匍匐以驚骨載夷猶以斷  
腸北風蕭蕭兮寒山蒼蒼朔雪霏霏兮陰煙茫茫陳絮  
酒兮靈於何望送冰塗兮子於何方吾於靈慕兮訣絕  
太荒靈於我感兮依稀在傍

代高氏兄弟祭管子暨貞妹文

嗚呼桂林芳枝昆山美瓊何青妙之未揚膺玄召於太清而淑人之相從以殞且莫窺其衷誠生同欲也靈胡捐而自輕死同惡也靈胡愛而獨成毅然有以彰天地之大經卒焉無以為骨肉之至情父兮懷汝九原未瞑母兮篤汝雙璧斯迎同胞雅愛鸞鳳飛鳴胡隕爾天胡累爾生視塵寰也若浼趨冥漠也若榮何苟生之不可何苦節以用貞果於自沈不以一勺或慕忍於自毀不以一息易名超然之識出於凡陋烈然之操冠於豪英

謂蓋壤之博也嘗以一節而獨咤謂古昔之曠也每於  
列傳而曾驚邇者金玉之質產於同氣冰霜之烈赫於  
家聲詩書表垂世之澤山川還儲毓之精白髮哭青春  
於芳草紅淚吊淑女於佳城且不知其死可哀耶行可  
尚耶聯旌辭祖舉將茫然於蓬瀛

送疥文

海壑老人七十有三齡病疥痛痒搔楚不勝覲望無痊  
三年於茲聞昔人有病窮而懟於鬼送之以文余因意

其茲或有崇焉者戲效以送曾聞以邾婁取喻者謂患  
不及於腹心乃有賦楚臣好色者擬穢惡之並深始焉  
肌膚隱隱芒刺陰侵繼而突顆累累珠璣浸淫嗟痛痒  
之無時悲日夜而難禁搔之而素雪零蠡深無內頃焉  
而紅露漬熾燎在臨當賓祭而蚤虱潛伏處燕閒而爪  
甲相尋據不安於綺席僵不妥於錦衾踏月尋階而如  
慄倚風撐杖以曷任牙籤在案卷舒惟倦停披晴窓忘  
情文苑屈伸愁予囊弦索如宮徵不調鷺鶴云疎國手

從敵而未廖虎穴得子以何由猩毫艱於健握驪珠滯  
於探求綸竿暫歇何意垂釣斧斤且息無事樵游徒袖  
手以窺雲谷聊微步以倚煙樓掩鏡局扉焦心不愜蓬  
首垢面殘軀如怯自冬徂春擬除舊而更新繼秋復冬  
轉纏綿以相因胡寒暑之屢易但生滅而仍頻雖康齡  
其莫支矧頽年而苦辛覲冥逃於壺觴尋復增劇欲効  
靈於藥石累見無真良平無以售其智盧扁莫以善其  
身計無所出籌何所施心煩意亂志倦體疲默仰圓靈

潛祝方祈大而四時之運神有所尸小而一人之身鬼  
或所司如游光之肆薦疫方良之恣陰私三彭傾人於  
不善二豎為災於出奇或擾於內而沈痼莫及或凶於  
外而反復顛危適來之咎乃不滋疑渺然衰叟何以罹  
斯其或不能奪人錦攀天香持毛槩戰文場振脩翮於  
雲漢奮獨步於驕驕負家邦之覬望銷海岱之聲光降  
罰手足迺若此耶抑或不能獻策金門紓誠帝闕揮翰  
玉堂分閭鐵鉞勤奉主於鳴琚急親賢於握髮甘貧賤

於清時徒懷安於滄渤厚懲手足又若此耶思之思之  
若將有知甫自成童功名念茲紅顏白髮得意無時不  
爐不扇手無釋卷暑濕風寒晚齡末見原積漸而身災  
更崇愆而神厭或不事犁鋤專尚清虛錦衣華堂寒熱  
媒且彼幽斯瞰患曷可除伊感本於自貽蹊田過於見  
奪被其毒者甚於水火主其柄者欲其轉幹以富可戀  
歟世宦清廉而自若家聲琴鶴以相承汝將窮奢而極  
慾我非金谷與銅陵以貴可附歟投簪二十餘年結蕙

海山云暮汝將炙手而趨炎我非權門與要路反覆長  
意憤惋不直學道平生四體罔失撫謙敬恭素履坦易  
薄氷恐陷琬琰如執蹈舞何知樂茲樂實爾稱為鬼號  
曰通靈胡滯於一胡混於冥指摘萬類用裨紀經德惟  
錫祉惡用不寧乃有倍孔子之四達道蹈孟云之五不  
孝翻覆雲雨貪殘虎豹鑽緣相高奔趨胥効抗亂綱常  
蠹壞禮教爾宜橫其崇充其類變而通谷而備使之痒  
疴以反其躬自其疾痛以殺其恣於逆黨死而後已雖



偷生少焉知忌不愈於无妄以肆災亦足為乖氣以致  
異盍知往而察來盍異趨而斯避便須逆駕速宜縱轡  
蘭薰椒醕之莫陳桃弧棘矢之將累若其慷慨遂行是  
謂有知且明如復夷猶濡滯乃謂無識而盲尋畢除而  
無悔其戒滿而惡盈嗚呼別矣式將訣今天下之情動  
之惟誠黯然銷魂者原於意氣之相傾願為比翼者激  
於交好之莫并爾於我乎何榮吾於爾乎何矜侂行李  
之將戒覺微躬之方瘡為歌今日之驪駒效贈昔人以

不拜

海壑吟稿卷十

欽定四庫全書

海壑吟稿卷十一

明 趙完璧 撰

與丘月林給事書

前軒車東來未暇一言而返久許勞思不慰片時款教  
悵恨何如聞即吉坐失趨候衰病窮居艱於動履惟賜  
體亮想非行不日此別仰陟釣衡慰瞻盛世而丘林野  
老日趨凋朽再圖良晤河清之俟更幾何哉茲遣候情

金史四庫全書 卷十一  
抱無涯書莫能悉臨楮悵然知復云何惟知己鑒原

答毛行齋太守親家書

牛馬走蠢愚無似苟延五紀何益明時消損天日負媿  
良多豈期謬辱盛使惠我好音眷我珍品捧慰登嘉感  
佩寧有既耶尚容遣候使還暫此伸謝

又

數月來家務瑣冗未遑馳候適聞道體違和鄙懷切切  
徒抱趨侍悃私奮飛安得想斯文之係匪輕吉人之佑

有在擬復安然倍常矣況君家孝子慈孫自善調攝無  
憂也謹專人齋小牘奉問惟避俗清心重加玉愛以永  
仙齡以慰天南寸慕不備

又

前令孫回已具啟謝近聞海屋初度在即擬將趨瑤臺  
執霞觴以効蓬山慶誠奈塵冗衰疴不果初志且若之  
何北望迢迢耿懷無已敬遣蒼奴持罌醕籠果少將逖  
忱其為我頤揮萬萬

與舒城孫生書

疇昔邂逅京邸垂我款私示我肝膈揆照涼薄何緣雅  
遇胡十餘年來去留異迹離合靡常風塵中令人常抱  
惘思曾不得把臂朝夕以敦舊好情如之何卯科仰冀  
魁名黃屈既往千年傾候垂光轉加落寞是何不遇之  
數耶而倫絕見忌耶抑亦晚成而大器有需耶茲者酉  
宿天開文光照於廬岳想休徵端在子矣秋風發而桂  
翻春江波而花暖得意驂騑長安之勝一朝遍矣不識

通家兒曹獲蠅繫否不肖苟祿西城五年餘叨擢鞏昌  
出監靖虜邈在邊陲荒山紫草殊絕中原雖上下之情  
每有相宜而風土之薄良無所賴甫半載而來琴鶴蕭  
然海山恬若科名眊眊於少年勲業衰頽於青鏡閱來  
世務賢否之乖宜清濁之異遇物理顛倒幽獨祇默於  
邑耳然又嘗竊彷彿人之觀乃不順適所天也耶栖遑  
林壑底以先廬給以山田詩酒琴書此焉自足鶯花風  
月知己無多惟此老焉竟何足齒適舍親分教來始以



彼之獲依於執事為甚幸而繼以不肖之得通於門下  
為尤幸也草此聊陳久曠懷私瑣瑣無倫惟高明賜亮

與任丘邊通府書

別來久許不奉顏色悵惘彌深聞候京師不識擢補何  
城想暫復而大遷矣美質清才真明時利器他日寵榮  
曷可量哉何似不肖迂疎方稜動見觸迂滋謗賈禍竟  
所不免委棄山野適分之宜粗有敝廬薄田優游海上  
與林壑居與雲霞侶鳴桐酣醴散帙詠歌瓊林桂闕付

之三郎秋月春翹陶於百歲清狂野叟何足為朝紳齒  
耶但夙蒙雅愛會晤無繇而音塵曠絕不敢不以私悃  
相寄也前所託海天泉壤二冊近曾注意否倘不見遺  
萬一獲協初志沒齒曷忘千里惓惓不勝遙懇之至

又

違教六載忽焉逮茲海山脩迴光景迅逝奈老懷何哉  
林谷岑寂偶辱華札兼蒙珍惠自天之隕感媿何如捧  
讀間既諗大擢曷勝欣忭及再聞尊閭謝棄之變震悼

不任想驚續已久探珠消息近不識幾許也此亦不肖  
為兄宿懷焉者然瓜瓞末豐理數必至敬候佳音足為  
遐慰蘇驚回敬此奉謝仰恕不恭切切

與濟南王羅溪通府書

別來數載夢想光顏無由為慰每念疇昔叨侍京師稠  
人中俯辱高情方寸懷私刻鏤何能泯沒適聞榮擢東  
藩佳聲騰播溥延海岱君侯奇績南北之間亦偉矣哉  
大拜明時畫期可待不肖西隴來歸棲遲海上劬山漁

水聊復終老惡足云小兒慎幾以省試來謹茲候問惟  
台鑒不悉

與王冠峯書

再辱翰札謝謝別忽半載淮海悠悠何如為情撫良時  
抱長憶耳聞舒之士風純雅土俗寮窠蕉際一時之盛  
慰慰惠來漁歌竒譜小試頗佳但訛謬太甚煩暑中不  
暇密審姑候涼秋徐按之以副遙愛使旋暫復祈賜照  
鹽城答王冠峯書

昨淮上人歸得手教知浩然高舉撫掌歎賞急流之勇  
當時孰有逾於君者煙漠雲嶠恣意徘徊況壯年強健  
天趣無涯不肖又輸君一頭地雖然滄浪潦倒中且猶  
勉爾競為風月主方日夜埃東攜取枯桐古音以相陶  
寫於雲水之陽每欲奮一颺翰蓬煙杳如楚天莫慰且  
若之何悵懷悵懷羽便率爾奉候涼秋蕭條瞻慕不能  
為情擬幽人會此區區是仰

鹽城與姜石澤封憲老親家書

別來不親教範奄歟逾年桑榆契侶頓致杳違淮海浩  
渺中時復令人回首俟期而旋何如慕渴吾兄願養滄溟  
陶意種種天禧無涯而相業有託景羨景羨不肖從兒  
曹小宦邸扁鑰閒寂不任結束仰東山杖屨徒五內燥  
熱焉耳便中小致問私餘再候

鹽城答黃海洲書

仰間忽承手札兼再辱寵貺謝謝吾兄晦養雲需會心  
魚鳥於勢分莫撓清曠之娛迴自翹企不肖凝寒中逐

孱弱書生間羈粉郎顧淮海煙雲不任惆悵冀春來旋  
旆以慰夙況且復伺通猿鶴或有期也兒曹株守小吏  
久忝素延祇貽遙莞爾來教已悉想閱遺聲賢德休  
光自足感人於無既自分卑微揆不為人重輕也勉令  
轉為裁候聊致葭莩至意以自盡耳敢遽圖君家補益  
云乎媿媿鴻返此復希原照

謝平度崔生

疇昔京邸辱枉未遑從容聆唾音抱歎未既邇年來兒

曹往返取戾門下良多鄙懷耿耿忽復瓊函有隕珍品  
猥頒捧誦拜嘉頓令慙汗豚犬兒謬附末第曾無足齒  
道沾被寵錫若此怖感曷勝久仰跌宕雅懷曠逸高致  
海山風月中良儔也何白首衰殘經年百里竟不獲一  
挹芝采探玄機淑道妙川逝悠悠俟復何時此為悵恨  
使還倉卒敬此附謝

與即墨湯君陽大尹

邇聞寵陟鸞音別榮熊駕林壑慰然可謂無負賢勞矣



似於俊才偉績少有不協殆明世登良要有漸次隆崇之典仍合旦夕期也然體國仁賢應自有後獲深識鄙窺何如何如但墨水蒼生無復冠借膠湄黃髮靡從斗瞻茲焉悵爾早圖叅謁之行適為良晤何意并坐塵闥尊駕稅於王而不知尋候於姜而弗遇再要於匡而星輶長往矣縱橫顛越仙跡杳然徒令望塵愧恨負罪庸何可言敬茲遣謝魚附鄙稿用塵清閱佛頭之穢誠無足云亦聊以竟嚴命爾統惟原照

鹽城謝劉雪溪太守書

僕衰殘朽質沈跡溪壑方過眷西伯頓睽南服周悉高  
情備辱臨歧殆偕日俱新也邇忽秋暮春回海山如失  
清顏曠別夢想何依竊念瀕溟枯槁罔不慰被青陽顧  
區區末路邈越楚雲可能侍粢花於清颺剪芳蘭於良  
夕叨恩如昔耶白首馳神青冥鍛羽俟時而東惡知其  
九霄靈鳳千里神虬亦焉攸寓嘉樂淑人竟我心惻奈  
我翁何哉風便小裁敬致遙悃岑寂中不盡悵懷仰冀

德涵萬一

答紀鑑塘司徒郎

忽教音猥及高情款悉走衰朽林丘曷堪屑惠無乃德  
之至愛之深不我終棄爾耳足下清才朗識巍陟徒卿  
進依英主退協仙僚優游鵷省中議政論文自是青雲  
竒趣昔人謂向長安西笑企慕何如時復大擢柱輔擬  
樹無前偉績於昌期走之所遙欽而仰羨者指可勝屈  
耶且不替兒曹舊好澤益有歸感念殊切逖謝幽忱良

莫能極潦倒岩阿強勉報候第恐煙霞鄙悖唐突風雲  
取罪萬萬清秋爽颯塞氣高涼懇冀玉息以將天休臨  
書悵惘無既

答福山郭嗣翁尚書

瞻企間忽仙翰俯臨兼天機有隕發函媿感仰謝仰謝  
頃在淮咫尺無聞坐失良晤令人惘恨不肖自南歸俗  
務纏牽殊乏清興新聲舊譜兩負夙心向亦無得今且  
幾忘矣聞山居吟得之桐菴者想亦造妙而陽春樵歌

曾記於邊邸譜贈或亦不可棄也數曲之雅真足以快  
適東山矣又奚以多為哉然嘗緬惟高致風月邊空復  
劬勞每有東勞之思海市之想俄慰此行擬當一候門  
牆然白首桑榆知復將來何似亦聊云此一胡盧耳黨  
人之變諸子姪无妄被災苦何可言幸昭然餘不足憾  
矣辱蒙言念感感別啓來教已聞命今亦未敢輕擬其  
人俟從容馳報

與安丘黃甥茂才書

久曠情疎殊切懷念向聞春試優選欣慰不勝既而秋  
鏖失利更增悵悵然妙齡青紫時復當芥拾也雲霄天  
馬何患於暫蹶耶但淬礪無輟以速嗣前武丁寧耳吾  
庠吳冠老俊逸高雅人也今擢貴庠教長將渠泮生輝  
春風轉徙也予其善事之渠脩吾膠誌創稿未半遽有  
此行將攜彼處終之及思我先君墓誌乃若翁海野筆  
也今原稿已遺想賢甥家藏者猶存可檢出錄致以備  
風采蓋首欲不泯英才鴻筆而先人實行亦賴以不墜

吾與子不偕恤於心乎子其念之臨書不罄懇私惟孝  
子仁人鑒察之

答章丘胡湖山三尹

適辱教翰切慰渴懷幸接玉郎再諭吾兄二十餘年履  
歷動定深恨璫璵重器不獲大揚明時輶軻峴岵竟致  
山野遺逸自君子觀之不無倒植之嘆乃聞諸郎若孫  
桂蘭叢茂秋來當自有効竒捷者不將以信兄所未信  
耶亦姑陶適煙霞從容迓玄錫耳竊為默慶之再憶疇

昔都城一覲英風而豪人意氣便投肝膈亦傾蓋猶  
夙契焉者未幾儵別悞觸權豪猶賴故人夙愛致蒙元  
老科臺俯為垂手公論不泯而瀕萬死者僅得一生何  
幸如之偷生苟祿忝擢輦昌塞垣淒寞良非衰老所堪  
六越月而歸乃酬素願栖遑海岳間犁鋤編簡傳家舊  
矣誨諸郎以是老焉已也何意二郎慎脩濫叨甲第蠢  
子迂翁實出望外及謬尹鹽漬亦嘗俯逐琴鶴聊適晚  
懷於淮海也三載還兒復忝附郎署曾何勞績近補維



揚令人慙悚不肖衰齡適今七十又七老荆少五歲而相偕豚犬兒三慎幾亦叨廩慎動附庠末小孫四而儆當志學畧知文字亦可粗繼書種供桑榆玩弄也且拾先人之餘材完小子之新第琴書餘暇松竹盤桓癡延淹嵒餘映朝夕所不可知者亦一付之冥造耳吾兄果有東山高興秋風春日引首西岑正懽百年志願何如慕何如慕恃愛瑣瀆忘陋取罪仰惟老知已情鑒

謝維揚嚴紹峯貳守

久企芳聞不階瞻挹瓊采拱聆珠唾以雪洒衰朽塵抱  
空復馳神江淮耳竊幸兒曹忝厠左右辱益良多琬琰  
華英不棄葭倚是為遠荷昨兒書來啓函得善冊一帙  
倉皇再閱乃知鄙稿也又復捧誦首尾佳篇乃知二公  
賜愛也本海壖野語暫藏之敝笥終當覆瓿焉耳曷意  
塵之名家而且梓焉刻製端整裝繕雅麗自揆鄙俚豈  
宜過蒙稱譽重勞增美若是耶無乃陶瓦賤質朽株棄  
材悞飾之金玉章之青黃耳愛之深寧不使媿之益深

乎又聞垂念賤辰猥惠錦製珠光玉瑩頓令南極增輝  
東瀛生色身膺垂老之慶家傳不世之珍也刻感更當  
何如便此統伸謝私衰眸病骨草次不恭臨風莫罄鄙  
懷邈越天南勞望靡既祈惟台照惓惓

徐瞽道募緣疏

竊以太玄溥化妙無外以何仁品彙肖形私有生以成  
性洪纖各足終始相忘稟賦惟均得喪或異椿齡芝秀  
草木且復歸根龜息鶴胎禽獸亦知有養是以智超苦

海者不同腐於塵緣見爽真機者欲高飛於仙界鼎湖  
龍去金華貽萬古之思函關牛歸紫氣協千年之瑞然  
道不可以易致必假脩為況神每限於難通豈宜鹵莽  
金丹妙煉惟須靜定還虛玄關微機曾傍紛華入聖子  
晉長辭魏闕而笙鶴微茫希夷高卧華峰而雲霞縹緲  
故奮凌霄之志者寧久滯於樊籠竭慕貞之誠者不暫  
依夫燕雀哀人身之一失萬劫惟難戀世法於七情九  
賊何減徐子崇輝自九齡而波冥銀海返觀紫府清虛

悟百歲而電滅靈山長往白雲閑寂早依禪室苦空金  
粟如來日奉沙門護持貝葉般若竹槎曾卓錫蓬雲十  
載潤袈裟鐵櫪再開山池影幾年清智慧志上人力行  
妙道非不根徒誦狂言欲了真如可期後世奈仙緣之  
猶在赤松黃石每神交矧芳名之猶存玉室丹臺曾默  
識迷途猛省脫拋身入身之煩急流挽舟會用鉛棄鉛  
之妙違雪峯而趨玉極慙慙窺潭底日輪捨龍鉢而就  
鶴衣蕭散翫山頭月片脩性而遺命何如性命之兼脩

得陰而失陽奚似陰陽之兩得江湖曠蕩荏苒曾遇高  
真吳越徘徊繁華可能幽僻池亭水榭總為歌舞之區  
野寺山房盡是遊觀之所北人南悞空嗟萬里之勞紅  
霧白頭慨失半生之計利名場覷破罕得披沙見金聲  
色闕打開誰識被褐懷玉幡然故國何假遽廬吾黨多  
情仙鄉少遇秦皇漢武尚塵蓬島之懷龐萌海蟾且逸  
勞峯之興挾清風而載返還思滄海揚塵跨雪羽以言  
旋重嘆城郭如故真人所至從之者雲仍妙道攸存宗

欽定四庫全書


卷十一

之者日盛望青蒼而高蹈欲慰平生躋危嶮以幽居用  
償夙願翠屏岩畔怡三生舊日精魂華樓宮巔接萬里  
紫霄煙靄罔辭塵陌他年之蟬蛻何期小結蓬茅此日  
之龍珠堪養金爐玉鼎顧佳地以何妨水虎火龍還先  
天而有藉然身歸靜域自應削跡於闐闕道慕玄門詎  
合縈魂於世俗若無外戶豈得內脩世財罔施仙緣難  
遇窮鄉孤坐初難氣滿而忘食多侶寡儲終當壁立以  
待哺伏望四方聖衆一切善流弘開惠愛之門大建慈

悲之業負風德者定圖後効於來生崇陰功者必致善果於旋踵施恩於不報乃所以廣種福田力善於無聞亦將以終歸樂土黃金綠鏹借天地以迎恩尺布斗糧託鬼神以降鑒善緣速結須知天道好還惡報難明宜察人壽有幾請為推心以利物豈謂假天以欺人庶大道可借以有成而小補聊資於託始陽谷之晷斯繼於燧鑽飛廉之功獲濟於揮翮勢以微而裨著事以瑣而助洪功同八百之中行合三千之內給孤長者事有明



徵元始天尊照無私漏諸天傾耳一體回心蹉失善緣  
幽沈難悔



海壑吟稿卷十一